

鐵樵先生墓表

朱霞陳氏清初由湖北遷平江占籍不詳所自郡縣或曰黃州
五傳至鐵樵先生先生之考諱大秀祖諱世英曾祖諱耀科卽
始遷祖之子世有重德先生諱永福生於嘉慶丁卯二月十九
日卒於同治戊辰十二月十九日春秋六十有二初葬楊家源
越五十年丁巳改葬仁里段董家嘴乾向之原又八年其孫又
新狀述行誼屬長沙黃兆枚表諸墓道先生少穎異能讀書有
兄弟六析炊後兼講樹藝生五子耨鋤詠歌自督逾勤應事盡
識與力不自隱重咸豐間縣書院闕膏火厚輸以濟及東征事

作又輸之粵氛將入平界鄉之圍而守者紛欲竄散則爲指授
方畧選要扼禦卒如其策無事蓋天下巨患在於士類跛軟人
才乏絕詩書之氣不深義理不勝然後岐黠叢長犯逸禍流都
野天子以詔置吏置吏以責有司旣極憂勞併力虔刈雖田野
細民亦往往發其忠義慷慨之性相與有功夫一鄉一邑之地
得一尋常之人能使後生俊秀釀其名業絃誦於兵革之外雖
剽寇至相保而不驚當其時或忘其功之所自先也及於事過
而推其始始翕然歸之而彼人者乃獨以謂身享毛土爲吾分
之宜爲一若出於天性之固然非迫而後應風俗之厚人心之

未濟六七十年以前蓋有如此故雖極亂而易反於治何其盛也先生配向氏繼配張氏子昌藻昌萍向出昌蔭昌蘩昌芹張出孫十三人曾孫三十四人玄孫三十三人來孫七人其子昌蔭孫日新又新曾孫澤民皆諸生曾孫澤涵湖北審判廳推事兆枚鄉舉時曾一至先生之家時先生沒已三十年矣門庭整清儉而知禮已私甚慕之而其鄉之老人尤能言先生釋紛難好施予仁育義正諸盛德事稱爲漢爰延謝弼蔡衍之流鄉先輩有典則人也

清賜進士出身花翎員外郎銜吏部文選司主事安徽直隸州

知州長沙黃兆校撰文